

DOMENIE XX «VIE PAL AN»

Antifone di jentrade Sal 83,10-11

Viôt, Diu, di chel che nus pare,
cjale la muse di chel che tu âs onzût.
Une zornade tai tiei andits
e vâl propit plui che no mil di altris.

Colete

Diu, che tu âs preparât bens invisibii a di chei che ti amin
spant sui nestrîs cûrs la passion pal to bonvolê
par che, volintti ben in dut e sore dut,
o rivin a sigurâsi lis tôs promessis
che a van plui in là di ogni nestre brame.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 56,1.6-7

I forescj ju menarai fin su la mê mont sante.

Dal libri dal profete Isaie
Il Signôr al dîs cussi:
«Metêt in vore il dirit e praticait la justizie,
parcè che la mê salvece e je prossime a rivâ,
e la mê justizie e je par pandisi.
E i forescj che si son tacâts
tor dal Signôr par servîlu,
e par amâ il non dal Signôr,
e par diventâ siei servidôrs,
e ducj chei che a rispjetin la sabide vuardantsi dal profanâle,
e che a tegnin dûr intal gno pat,
jo ju menarai su la mê sante mont,
e ju colmarai di gjonde te mê cjase di preiere.
I lôr olocausej e i lôr sacrificis
ju varai agrât sul gno altâr,
parcè che la mê cjase e sarâ clamade
cjase di preiere par ducj i popui».
Peraule di Diu.

SALM RESPONSORIÂL dal Salm 66

R. Popui ducj, laudait il Signôr.
Che Diu al vedi dûl di nô e nus benedissi,
che al fasi lusî parsore di nô la sô muse,
par che si cognossi su la tiere la tô strade,
framieç dai forescj la tô salvece. **R.**
Che a gjubilin i forescj e a berlin di gjonde,
parcè che tu tu judichis i popui cun justizie

e i forescj de tiere tu ju dâs dongje. **R.**

Che ti laudin i popui, Diu,
che ti laudin i popui di dute la tiere.
Che nus benedissi Diu,
par che lu rispjetin ducj i confins de tiere. **R.**

SECONDE LETURE Rm 11,13-15.29-32

Dai regâi dal so boncûr e de sô clamade par Israel Diu no si pintîs mai.

De letare di san Pauli apuestul ai Romans

Fradis, a vualtris, paians, us dîs chest: come apuestul dai paians, o fâs onôr al gno ministeri, cu la sperance di rivâ a stiçâ la gjelositè di chei che a son dal gno sanc e di salvânt cualchidun. Di fat se la lôr esclusion e je stade riconciliazion pal mont, ce no saræ la lôr riamission, se no une resurezion dai muarts? Parcè che dai regâi dal so boncûr e de sô clamade Diu no si pintîs mai. Di fat come che par vieri o vês disubidît a Diu e cumò o vês cjatade misericordie par colpe de lôr disubidience, cussì ancje lôr cumò a son diventâts disubidients in gracie de misericordie doprade cun vualtris, par che ancje lôr cumò a puedin scomençâ a cjatâ misericordie. Di fat Diu nus à sierâts dentri ducj te disubidience par podê vê misericordie di ducj.

Peraule di Diu.

CJANT AL VANZELI Mt 4,23

R. Aleluia, aleluia.

Jesù al nunziave il vanzeli dal ream
e al vuarive ogni sorte di infermitât tal popul.

R. Aleluia.

VANZELI Mt 15,21-28

Femine, cetante fede che tu âs!

Dal vanzeli seont Matieu

In chê volte, partît di li, Jesù si ritirà tes regions di Tîr e di Sidon. E ve che une femine cananee, di riunde di chei paîs, i berlave disint: «Vê dûl di me, Signôr, fi di David; mê fie e je tormentade dal diaul tune maniere tremende». Ma Jesù no i rispuindè nancje une peraule.

I siei dissepui i lerin dongje e lu preavin disint: «Scoltile, che e sta berlant daûr di nô». E lui ur rispuindè: «No soi stât mandât che pes pioris spierdudis de cjase di Israel». Ma jê e vignì a inzenoglâsi denant di lui e i disè: «Signôr, judimi!». E lui: «Nol è ben cjoliur il pan di bocje ai fis par butâural ai cjanuts». Ma jê i disè: «Vere, Signôr; che di fat i cjanuts si passin dome cui fruçons che a colin jù de taule dai lôr parons». Alore Jesù i rispuindè: «Femine, cetante fede che tu âs! Che ti sedi fat come che tu vuelis». D'in chel moment sô fie e restà vuaride.

Peraule dal Signôr.

Su lis ufiertis

Acete, Signôr, i nestrîs regâi
che nus permetin un incuintri cussì splendît,
par che, ufrintti ce che tu nus âs dât,
o podìn riceviti propit te.
Par Crist nestrî Signôr.

Antifone a la comunion Sal 129,7

Cul Signôr si cjate il boncûr
e grande e je cun lui la redenzie.

O ben: Zn 6,51

O soi jo il pan vîf, vignût jù dal cîl, al dîs il Signôr,
se un al mangje di chest pan, al vivarà par simpri.

Daspò de comunion

Signôr, par chest sacrament di Crist che o vin partecipât,
o prein cun umiltât il to boncûr
che tu nus fasis someâ a lui in cheste vite
par podê spartî il so destin di glorie.
Lui che al vîf e al regne tai secui dai secui.